

書叢本基學國

書政公忠文林

著 徐 則 林

行發館書印務商

書叢本基學國

書政公忠文林

著徐則林

行發館書印務商

中華民國二十四年四月初版

(84052.1)

國學基
本叢書
林文忠公政書一冊

每冊定價大洋陸角

外埠酌加運費匯費

著 者

林

則

徐

發 行 人

王

雲
上海河南路

五

印 刷 所

商

務
上海河南路
印書館

發 行 所

商

務
上海及各埠
印書館

翁

敘

侯官林文忠公疏稿三十七卷。海內士大夫爭相傳誦。宗棠嘗取而讀之。有以知公生平居官行政之大略。如景星慶雲。照耀天半。郁郁然動人瞻仰。而不能已也。光緒甲申。宗棠奉命督師。重蒞閩嶠。距公之卒三十有六年矣。孫工部員外郎洞淑。丐宗棠敘憶道光己酉。公由滇解組歸閩。扁舟迂道訪宗棠於星沙。旅次略分傾接。期許良厚。忽忽四十年。久欲一摠感念。而未得一當。是書之敘。何敢以不文辭。閒嘗論之士生隆盛之世。位至疆圻。凡夫民生國計。輕重利病。罔非一心之貫注。而究其所以維國脈。而示後人者。祇落落數事而已足。嘉道以來。天下切要之政。莫如講求吏治。整頓錢漕。加意海防。諸端公之密陳僚屬。考語則曰。督吏莫先於自察。必將各屬大小政務。逐一求盡於心。然後能舉以驗屬員之盡心與否。其陳漕運利弊也。則有一本原。一補救。一本原中之本原。一補救中之補救。道光己亥庚子之歲。西夷英吉利。稱亂粵東。公銜命查辦海口事件。修築虎門橫檔。各礮臺。擊夷船於尖沙嘴潭仔洋官涌等處。斬馘甚多。夷目義律遁澳門。公慮夷人之竄擾鄰省也。疏請敕下閩浙江蘇各督撫。嚴防海口。其陳夷性無厭。得一步卽進一步。若使威不能克。卽恐患無已時等語。皆洞悉奸譎。如燭照數計。迄今數十年。談海防者。必推公天下無賢不肖。皆知公爲國朝名臣。非可企而及也。宗棠荷三朝知遇。屢膺重寄。自維服官臨民之際。未能希蹤先哲。今老矣。屬以法夷構釁。海疆多事。蒞公桑梓之邦。親歷各海口。見公所建礮臺。形勢扼要。

證以是書所云。益歎公忠誠體國。獨有千古。然則公之傳固不必以是書。而是書已足以傳公矣。小駟迫促索敍。謹綴數言付之。軍書旁午。心緒茫然。刁斗嚴更。枕戈不寐。展卷數行。猶彷彿湘江夜話時也。光緒乙酉仲春湘陰左宗棠敍於榕城皇華館

上諭

道光三十年十一月十二日。內閣奉上諭。前任雲貴總督林則徐。由翰林洊歷外任。疊蒙皇考簡膺疆寄。宣力有年。上年剿辦雲南保山匪徒。調度有方。渥荷恩施。賞加太子太保銜。並賞戴花翎。旋因病請假回籍。朕御極之初。知林則徐平素辦事認真。不避嫌怨。疊經降旨。宣召來京。嗣以廣西匪徒滋事。特授爲欽差大臣。頒給關防。令其速赴軍營。剿辦前據馳奏。已由本籍起程。方冀迅埽邊氛。以綏南服。茲據徐繼奮馳奏。該大臣沿途勞頓。舊疾復發。於廣東潮州途次。遽爾溘逝。念其力疾從戎。歿於王事。覽奏殊深悼惜。林則徐著加恩。晉加太子太傅銜。照總督例賜卹。歷任一切處分。悉予開復。應得卹典。該衙門察例具奏。伊子編修林汝舟。文生林聰彝。文童林拱樞。均著俟服闋後。由吏部帶領引見。候朕施恩。欽此。

諭祭文

維咸豐元年四月丁巳朔。越祭日乙丑。皇帝遣福建鹽法道戴嘉穀。諭祭於晉贈太子太傅。原任雲貴總督林則徐之靈曰。朕維文武兼資。徧寄八州之重任。忠清共見。洵爲一代之良臣。勤施已著於先朝。倚畀方殷於統帥。郵章告逝。奠帛增悽。爾晉贈太子太傅。原任雲貴總督林則徐。芸署起家。蘭臺擢秩。握文枋而疊收楨榦。膺察典而出領湖山。當皇考之初基。擇賢臣而特簡。觀河淮右。陳臬蘇垣。適值居憂。令要工之監理。許其終制。輟權事於齟齬。泊乎秉憲關中。建藩白下。載更楚豫。重莅秣陵。重念金隄。命持玉節。旋寄撫循於吳會。晉膺總制於鄂城。入覲陳謨。荷中禁鳴騶之寵。銜恩奉使。宣巖疆遠馭之威。雖控制偶疏。難辭薄罰。而宣防永固。用贊成功。爰卽沙漠之行。俾任屯田之事。成勞甫著。拜京卿而暫領西陲。舊秩彌光。由關隴而總司南服。時值蟻羣久鬪。鯨孽未除。速運兵機。彌渡快先聲之奪。進綏蠻徼。捷書奏永靖之功。懋錫宮銜。榮頒吉羽。方壯猷之是賴。脩貞疾以引歸。朕嗣統之初。在廷交薦。側席望來朝之旆。屢降溫綸。頒符倚蕩寇之勳。欣聞行騎。方冀旄頭迅落。像寫麟圖。何期箕尾遽歸。識成馬革。念致身於王事。稽卹典於春官。宮傳崇加。後昆儲選。綜生平之不避嫌怨。宜恩施之備極哀榮。嗚呼。瑤尊式奠之時。眷深一德。丹旄還鄉之日。氣壯三山。惟爾有靈。定應來格。

林文忠公政書總目

東河奏稿一卷	一
江蘇奏稿八卷	一三
湖廣奏稿五卷	九七
使粵奏稿八卷	一四九
兩廣奏稿四卷	二三七
陝甘奏稿一卷	二八一
雲貴奏稿十卷	二九一

林文忠公政書

甲集 東河奏稿

卷一

補授河督謝恩並陳不諳河務下忱摺

奏爲恭謝天恩。並瀝陳不諳河務。惶悚恐懼。下忱。仰祈聖鑒事。竊臣於十月十九日。奉兩江督臣陶澍。行知准吏部咨。欽奉上諭。河東河道總督員缺。著林則徐補授。卽赴新任。毋庸來京請訓等因。欽此。臣謹卽恭設香案。望闕叩頭。虔謝天恩。伏念臣以至愚極闇之資。仰蒙聖主鴻慈。用至藩司。由河南調任江甯。甫經兩月。正恐未能稱職。時切冰兢。茲復渥荷恩綸。擢畀總河重任。臣自顧何人。疊膺隆遇。雖捐糜頂踵。不足仰答高深。感激涕零。莫能言狀。惟思河工脩防要務。關繫運道民生。最爲重大。河臣總攬全局。籌度機宜。必須明曉工程。胸有把握。始能釐工剔弊。化險爲平。而道將廳營。皆得聽其調度。非分司防守之員。事有稟承者可比。臣先由翰林御史。外擢浙江杭嘉湖道。本未經習河工。迨道光二年。奉旨補授江南淮海道。雖有兼河之責。但自是年十二月二十四日到任。至次年正月初七日。卽已蒙恩升授江蘇臬司。計在任不及一月。又值歲暮停工之際。不特河防形勢。未及講求。卽土埽各工做法。亦未目覩。至五年閒。奉旨

赴高家堰催工。爲時約有數月。而所見祇係砌石。所司祇係督催。並未經手工程。於河務仍屬閼隔。今若驟膺總河重任。旣不明於形勢。卽不審於機宜。縱使趕緊研求。已屬緩不及事。且河工尤以杜弊爲亟。必先周知其弊。乃可嚴立其防。臣具有天良。固不敢不認真稽察。然能自矢不欺之念。終無受人欺之明。平時未曉工程。難瞞通工耳目。若莅任之始。措置有乖。狡猾之徒。卽皆生心嘗試。況河工事務。與地方不同。地方有利常興。有害當除。所見未眞。可待從容察看。縱一時一事受人朦蔽。而挽回補救。猶可徐圖。河工事多猝來。計不旋踵。苟胸無定見。一事被朦。毫釐之差。卽成千里之謬。若以爲盡不可信。動輒駁飭。則又恐是非顛倒。緩急混淆。設或猝遇險工。束手無策。游移牽掣。致失機宜。彼時卽將臣從重治罪。在臣之一身。固不足惜。而糜帑病民。貽誤河防大計。上何以對君父。下何以對生靈。一念及此。不勝股慄。此臣所以輾轉思維。有必須量而後入。不敢貿然從事者。古稱陳力就列。又云。學而後入政。臣於地方政務。雖亦力所難勝。究曾學習十年。尙冀勉圖報效。若河工全未諳悉。何以設施。聖明之前。萬不敢有一毫欺飾。與其將來貽悞。莫若據實瀝陳。伏乞皇上格外垂慈。鑒其愚昧。俯允將河東河道總督一缺。另賜簡放。以重河防。此時幸在霜降水落之後。前任河臣嚴烺。尙未離任。仍可候旨遵行。再臣先經督臣陶澍傳奉諭旨。總司江北賑撫事宜。飭往災區。周歷履勘。臣遵卽先赴附近省城各縣。往來稽查。仍聽候督臣委員代理藩司事務。旋經督撫臣奏明。飭俟鹽巡道葆謙提調文闡事竣。將藩署事件移交代印代行。再往淮揚查勘等因。臣於災務事宜。業經頒發章程。正在移交出省。茲江甯藩司一缺。已蒙簡放。有人。臣無署中兼顧之事。更可專心賑務。藉以勉竭駑駘。現仍欽遵前奉諭旨。周歷淮揚一帶。查勘督辦。斷不敢稍圖暇逸。自

外生成。所有微臣感激悚懼下忱。不揣冒昧。謹據實具奏。叩謝天恩。伏乞皇上聖鑒訓示。臣無任戰慄屏營惶恐待命之至。謹奏。

接篆謝恩摺

奏爲恭報微臣接篆日期。叩謝天恩。仰祈聖鑒事。竊臣恭荷恩綸。擢任東河河督。當經具摺虔謝天恩。嗣由江南起程。遵旨卽赴新任。復經恭摺奏報在案。茲於山東途次。接奉硃批。一切勉力爲之。務除河工積習。統歸誠實。方合任用。盡職之道。朕有厚望於汝也。慎勉毋忽。欽此。又於夾片內。奉硃批。當今外任官員。清慎自矢者。固有其人。而官官相護之惡習。牢不可破。此皆係自顧身家之輩。因循苟且。尸祿保身。甚屬可惡。記曰。官先事。士先志。其可忽諸。欽此。臣跪讀之下。仰見皇上設誠務實。澄敎官方。訓誡諄諄。要在挽回積習。臣雖愚昧。具有天良。每念一介寒微。渥被聖明知遇。苟志存溫飽。念重身家。是已失讀書致用之本心。更何以仰酬君上。是以臣受恩愈重。悚懼愈深。夙夜捫衷。惟矢此不敢欺之一念。任難勝而心務盡。才未逮而守必嚴。且近閱邸抄。伏讀上諭。各直省督撫。宜潔己奉公。尤須正色率下。倘正己而不能率屬。則是形同木偶。於地方有何裨益等因。欽此。聖諭煌煌。至爲明切。况河工積習。尤所熟聞。將欲力振因循。首在破除情面。臣惟有自持刻苦。不避怨嫌。以防意者防川。以糾心者糾吏。務冀弊除帑節。工固瀾安。以仰副聖主委任提撕之至意。現於十二月初七日。行至鄒縣地方。准前任河臣嚴烺。飭委署臣標中軍副將穆奠邦。運河同知朱長垣。恭齋河東河道總督關防。移交前來。該處距任所六十里。臣卽於是日至署。恭設香案。望闕叩頭。恭謝天恩。祇領任事。所有應辦一切事宜。容臣查核案卷。悉心講求。周歷履勘。隨時

奏請訓示遵行。所有到任日期。除恭疏題報外。理合繕摺具奏。伏乞皇上聖鑒。謹奏。

四

驗催運河挑工並赴黃河兩岸查料摺

奏爲驗催運河挑工統計已完六分。現仍督飭續辦。臣卽赴黃河兩岸查料勘工。恭摺奏祈聖鑒事。竊照東省運河挑工。截至正月初六日。已辦三分有餘。經臣於奏報摺內聲明。親往驗催。旬餘以來。周歷沿河工次。南至滕汛之十字河一帶。北至汶上等汛。塘長各河。挨次履勘。凡已經挑完工段。除出土外。其鑿鑿大塊。堅冰。壘壘山積。詢之土人。僉稱歷年河凍。未見如今年之厚。是以挑工之費力。器具之損傷。亦較往年。加至數倍。臣目覩現挑之處。先須鑿起兩三層冰塊。或將凍土打鬆。然後得施畚揭。及至挑動之後。不免滲水。雖經隨挑隨戽。而隔夜卽又凍結。昨已節交雨水。河冰尙在堅凝。其貼邊墊厓之積弊。因土凍不能膠黏。已無所施其伎。臣當將所挑寬深尺寸。逐段丈量。驗其灰印誌椿。均相符合。尙無偷減情弊。惟沿堤出土之路。漸被泥漿拋撒。逐條凍積。名曰泥龍。往往工段挑完。而泥龍尙未除淨。雖據各汛員弁稟稱。向係全工完後。一律起除。但日積日多。挑運更爲費事。且一經春雨。更恐沖入河心。臣復嚴飭工員。押令夫役。凡挑完一段。卽起淨一段泥龍。其已挑未淨之處。官差夫頭。均先量予懲責。並因鉅嘉汛主簿督挑工內。有稍偏於東岸之處。雖量明丈尺無差。並非弊竇。但不居中挑挖。側注一邊。則靠西淺處。誠恐日久積淤。河身遂窄。不可不防其漸。現值工緊急之際。臣先將該汛主簿徐恂摘去頂帶。責令督夫加挑。展寬丈尺。務使一律均勻。俟工竣時。查驗如果協宜。給還頂帶。倘不如式。立卽咨革示儆。茲截至正月二十一日。統計各汛挑有六分工程。此後天氣融和。施工自易爲力。臣因黃河各廳購辦料物。亟應親往查驗。

並有督催土工。勘辦春廂事宜。均難延緩。卽於拜摺後。由濟起程。前赴豫東黃河兩岸。周歷履勘。惟查歷屆驗料。往返不過半月。臣於河務未能諳悉。必得將各工形勢。細加體察。諮訪研求。每到一工。卽不敢忽略走過。且思料物爲修防根本。果皆堆垛結實。防險當自裕如。若查料之時。稍任以虛作實。以舊作新。則冒項誤工。卽無有甚於此者。臣惟有細加拆驗。計束稱斤。總當從實從嚴。不敢稍爲將就。但歲添兩料。共有七千餘垛之多。逐一親查。卽不免多需時日。其運河未完挑工。一時不及兼顧。惟當責成運河道。往來量驗。並督飭廳營汛。開妥速費挑。現在只餘四分工程。自可依限全完不誤。啓壩鋪水。臣仍隨時密加稽察。如有草率偷減。卽行據實嚴參。不敢稍有徇隱。所有運河挑工。已完分數。並臣現赴黃河查驗工料緣由。理合恭摺具奏。伏乞皇上聖鑒。謹奏。

查驗豫東各廳垛完竣摺

奏爲豫東黃河各廳料物查驗完竣。並將辦理未能盡善之廳員。請旨撤任。責令翻堆賠補。以杜弊混。仰祈聖鑒事。竊臣於本年正月間。驗過運河挑工之後。卽於二十二日。由濟起程。稽查黃河兩岸料物。當經恭摺奏蒙聖鑒在案。旋由北岸之曹考廳上堤。查至上游黃泌廳。問渡而南。循順東行。復從歸河渡過北岸。查驗下游之曹河糧河二廳。計時一月有餘。業經竣事。竊思稽料爲修防第一要件。卽爲河工第一弊端。前次荷蒙特派欽差。查出虛鬆殘朽等弊。降革示懲。俾在工大小官員。咸知儆惕。臣仰膺簡任。且疊蒙訓示諄諄。辦工雖尙未諳。查料必先覈實。到任以來。講求訪問。因知堆料積弊。更僕難終。蓋料物應貯於有工處所。而河堤地段。本不甚寬。兵夫堡房。既經林立。積土雜料。又復紛紜。秫稽每垛。長至六丈。寬至一

丈五尺。占地已多。故堤頂未能盡堆。惟頭一層在堤上者。謂之門垛。其餘則爲灘垛。爲底廠。大抵門垛。近在目前。多屬完整。灘垛底廠。卽爲掩藏之藪。最易朦混。其顯然架井虛空。朽黑霉爛者。固無難一望而知。更有理舊翻新。名曰併垛。以新蓋舊。名曰戴帽。中填碎料雜草。以襯高寬。旁插短節稽根。以掩空洞。若非抽拔拆視。殊難悉其底裏。臣周歷履勘。總於每垛夾檔之中。逐一穿行。量其高寬丈尺。相其新舊虛實。有鬆卽抽。有疑卽拆。按垛以計束。按束以稱斤。無一垛不量。亦無一廳不拆。兵夫居民。觀者如堵。工員難以藏掩。聞上年自奉旨嚴飭之後。各廳辦料。皆尙認真。此次所驗料垛。除上年舊料。剔畱抵辦。不領錢糧外。其新購之料。丈尺多有出額。間有三五處。長欠數寸。臣先亦疑其偷減。及至拆束稱斤。仍無短少。細查其故。始知垛夫堆垛。每高至尺餘。必須用木板四面打緊。乃可加堆。而稽料尾細根粗。一板之敲。有輕有重。卽兩尾相接。有緊有寬。故有前面不足。而後面有餘。上截不足。而下截有餘者。均之無關於弊竇。惟一垛之中。成色竟不能一律。緣民間種植高粱。種類本不齊。一有黃色。而鮮明者。亦有似黝似紅。而質性亦甚堅挺者。是以前次部議章程。總以適用爲斷。以臣所查南北兩岸十五廳之垛。上南同知羅綬所辦最爲高大結實。簇簇生新。曹考睢甯商虞三廳次之。餘亦大都如式。惟蘭儀同知于卿保所辦料內。拆至蔡家樓一處。垛底有潮溼之料。雖據稟稱。係上冬雨雪之中。趕買趕堆。不及曬晾。目下並未霉爛。但此料晾乾之後。卽恐斤重有差。辦理殊爲未善。若遽照不適工用之例。革去頂帶。又與實在霉爛短斤者。無所區別。如僅責令翻曬補足。該員在任。復恐易於掩飾。據開歸道張坦具稟前來。相應請旨。將蘭儀同知于卿保撤任。免其革去頂帶。卽責成接印之員。逐垛拆晾。如晾乾有所折耗。仍著落于卿保賠補。俟補完之後。另

行察看酌量補用。至曹河糧河二廳料垛。以層縱層橫。逐排相間。望之似乎架井。而尺寸加大。斤重仍復不差。查係堆手粗疎。尚非偷減弊混。但究屬未盡合式。應令拆改另堆。該管竟沂道徐受荃。先經查驗。已據稟請翻堆。卽飭該道督視驗報。另行覆查核辦。又商虞廳有楮料被燒一案。已於另摺奏明辦理。所有各廳麻斤積土。亦已點驗如數。土工次第礮築。尙皆踴躍。應俟大汛前完竣。一律驗收。大河水勢。先於正月杪。因積凌初化。長水二三尺不等。近已逐漸消落。各工一律穩固。所有春廂埽段。飭據各道。擇節估計。均比上年有減無增。臣核定後。已令照估廂修。務使加壓穩實。以防桃汛長水。至運河挑工。現亦將次完竣。臣查料畢後。應先回濟。督辦啓壩放水。迎濟新漕各事宜。仍須再至工次。督防桃汛。另行次第奏報。所有查竣豫東各廳料物情形。理合恭摺具奏。再臣經過地方。麥苗出土青葱。已占豐稔。堪以仰慰宸懷。合併附陳。伏乞皇上聖鑒訓示。謹奏。

查勘商虞廳料垛被燒分別辦理摺

奏爲豫省商虞廳料垛被燒。已飭該廳賠補足數。並將防汛守廠各弁兵。分別降革飭審。務究起火根由。獲犯懲辦。以儆惡習。而重工儲。恭摺奏祈聖鑒事。竊臣來豫查料於二月初七日。行至開歸道屬之上南廳工次。接據商虞通判沈賜恩稟稱。虞城上汛十六堡底廠存稽一百六十垛。於二月初二日三更時分。忽報失火。當卽趕往撲救。正值風大火急。被燒五十六垛等情。臣查河工稽料莖束。皆關國帑。理應嚴密防護。不容稍有疎虞。乃適值臣來工驗料之時。忽報失火。恐因料物本未購足。借端捏飾。尤覺情節可疑。當卽嚴批開歸道。先飭該廳勒限賠補。務於臣到工以前。趕補足數。堆貯候驗。不得照依尋常例限寬俟。

一年賠完。如驗時短少虛鬆。或查有捏情。定卽從重參辦去後。旋於二月十九日。據稟賠補齊全。臣行至該廳。逐垛丈量。拆束過稱。實係買補足數。斤重無差。且成色均屬鮮明。尺寸尤多出額。臣當卽親至燒料處所。履勘形迹。該廠在南岸之南。地居底路。本屬空曠。不與民居相連。四面挖有溝濠。前設柵門。以時啓閉。原足以資防範。且經專派記名外委兵丁韓松茂等三名。在廠看守。並按舊章。交付該汛分防外委張奇亮。額外外委吳相臨。往來防護。該廳營亦以時巡查。如果管廠弁兵。慎守柵門。不許閒人擅入。何致有被燒之事。是典守之責。已不能辭。且臣訪聞黃河兩岸。迤東一帶。分隸河南歸德。山東曹州。匪類出沒。向有放火燒垛惡習。疊經前河臣具奏在案。其放火之故。或因偷料被拏。或因他事挾嫌。並有在廠之人。監守自盜。焚燒滅迹者。又查商虞廳購料。向派河營弁兵。分垛領買。而春閒料價。比年前倍爲昂貴。奸猾之徒。明知料垛被燒。例應廳員賠買。更可擡價居奇。是以燒垛之案。在督道將次臨工者。十居八九。乘急圖害。獲利倍多。而稅稽本爲燒烟之用。見火卽燃。不比燒屋燬棺。尙須引火藥具。迨至事過之後。賊據毫無。更不似命盜案件。尙有兇器原贓。可以查起比對。所以破案愈難。而此風愈熾。在廳員則以稟報無益。而賠補難辭。遂不免相率規避。隱忍匿報。或燒多而賠少。或借案以浮銷。名雖虧官。實仍糜帑。是誠吏治河防風俗人心之大害。堪爲切齒者也。但一時放火正犯。旣無指證。又未便操之過促。致有妄拏。惟防汛守廠各兵弁。總難諉爲不知。臣勘明之後。卽將守廠之記名外委兵丁韓松茂李鳳舞殷朝臣。拏交歸德府知府錢寶琛。嚴行審訊。並將駐防該汛之額外外委吳相臨斥革。分防外委張奇亮。先行降補。額外外委同被燒料垛內承買有分之記名外委兵丁袁秉禮等十名。一併發交該府。提集質訊。以期水落石出。仍

移咨撫臣楊國楨嚴飭地方文武訪拏放火正犯務獲懲辦以肅法紀而儆刁頑查處分例載河工燒燬物料該管官有借端捏飾情弊者革職嚴審究追若巡查不力以致燒燬料物價在一千兩至五千兩者該管官降三級留任一年賠完開復限滿不足數照所降之級調用等語此案商虞廳被燒料塏該管通判沈賜恩查無捏飾情弊已於半月之內賠完尙爲迅速似可仰懇天恩免其交議至該營協備杜曰讓巡查不力按例亦應著賠惟該廳業已賠完似可免其再賠仍俟訊明所管弁兵有無知情縱火另行核辦所有勘明料塏被燒已飭賠補足數並分別飭審查拏緣由謹繕摺具奏伏乞皇上聖鑒訓示謹奏

覆奏訪察碎石工程情形摺

奏爲遵旨訪察東河碎石工程情形據實覆奏仰祈聖鑒事竊臣於上年十一月內在江南途次承准軍機大臣字寄道光十一年十一月初二日奉上諭本日嚴烜奏豫省上南中河曹考三廳險工酌拋碎石一摺已明降諭旨准於豫省藩庫照數撥發趕緊採運矣此項碎石工程起於南河道光七年九月間始據嚴烜奏蘭儀廳柴壩十八埽以上已將碎石蓋護化險爲平十八埽以下及下北十一堡廂修歲無虛日此後年復一年更恐危險堪虞現飭各道仿照柴壩碎石成案分別估辦以爲固工節費之計等語是年蘭儀下北兩廳當經降旨准行既用碎石拋護則歲料防險等項自應節省乃歷年以來碎石工程無歲無之而其採辦來年歲料及請撥防險銀兩並未節省絲毫究竟此項碎石工程是否於黃河有益如果有益何以歲料並不見節省徒添出碎石一項費用林則徐係朕特簡甫經到任無所用其迴護此時亦不必亟亟著明查暗訪悉心體察情形據實覆奏將此諭令知之欽此當經臣附片陳明俟到東河訪